

Mid-Day Dogri News Bulletin, 14th July 2025

समे – 12:25

<><><><><><>

LG Statehood

उपराज्यपाल मनोज सिन्हा होरें आखेआ ऐ जे केन्द्र सरकार उचित समें पर जम्मू कश्मीर गी राज्य दा दर्जा बहाल करने आस्तै पूरी चाल्ली वचने बज्झी दी ऐ। इक नीजि टी.वी. चैनल गी दित्ते गेदे इक इंटरव्यू च उपराज्यपाल होरें जकीन दोआया जे जम्मू कश्मीर दे लोकें कन्नै कीते गेदे इस वादे गी पूरा कीता जाग। उनें दस्सेआ जे दफा 370 दे हटने दे परेंत केन्द्र शासत प्रदेश शांति, विकास ते सार्वजनिक जुड़ाव बधाने दी विशेषता आले इक नमैं युग च दाखल होआ ऐ। उपराज्यपाल होरें जोर देइयै आखेआ जे बक्ख-बक्ख खेत्तरें च महत्वपूर्ण तरक्की कीती जा'रदी ऐ ते सरकार समावेशी विकास ते रियासता गी तरक्की ते खेशहाली दे बत्ता अगड़ा लेने पर ध्यान केन्द्रित करा दी ऐ।

<><><><><><>

Amarnath Yatra

इस ब'रे अमरनाथ यात्रा करने आहले श्रद्धालुएं दी गिनतरी कल दो लक्ख था मती होई गई ऐ। अधिकारियें दस्सेआ ऐ जे कल श्रीअमरनाथ गुफा च 17 हजार सोयां मते श्रद्धालुएं पावन हिम शिवलिंग दे दर्शन कीते। जिंदे च 12 जहार 210 मर्द, 4 जहार 202 महिला, 264 न्याणें, 103 साधु, 18 साध्वियां, 6 ट्रांसजेंडर ते 514 सुरक्षाकर्मी शामिल हे। इक सोशल मीडिया पोस्ट च उपराज्यपाल मनोज सिन्हा होरें तीर्थयात्रियों दे पवित्र यात्रा लेई उत्साह पर खुशी जाहर कीती। उनें आखेआ जे एह जीवन भर दी इक पवित्र यात्रा ऐ ते सब्बने श्रद्धालु गी परमात्मा दी खोज ते अनुभव करने आस्तै मता मता सुआगत ऐ। इस मौके पर तोआई अज्ज जम्मू दे भगवती नगर आहले आधार शिवर था 6 हजार इक सौ 43 श्रद्धालुएं दा इक होर जत्था घाटी लेई रवाना होआ। इन्दे च कुल 4 हजार 691 मर्द इक हजार 248 महिला, 17 बच्चे, 167 साधु, ते 20 साध्वियां शामिल हियां। श्री अमरनाथ यात्रा 3 जुलाई गी शुरू होई ही ते एह रक्खड पुन्नेआ आहले दिन यानि 9 अगस्त गी सम्पन्न होई जाग।

<><><><><><>

IIM Jammu

भारतीय प्रबंधन संस्थान(आईआईएम) जम्मू नमें एमबीए, ईएमबीए, पीएचडी ते एमबीए(हेल्थकेयर) बैचें दा सुआगत करने आस्तै अपने जगती कैपस च अज्जै कोला 18 जुलाई 2025 तगर 5एं दिनें दे समग्र परिचय कार्यक्रम दी मेजबानी करने आस्तै तैआर ऐ। कार्यक्रम दी शुरूआत केन्द्र मंत्री डॉ० जितेन्द्र सिंह हुंदे आस्सेआ अज्ज दपैहरी लै इक नमें छात्रावास परिसर दे उद्घाटन कन्नै होग। उपराज्यपाल मनोज सिन्हा होर समापन सत्र च शामिल होंगन ते विश्व स्तरदे तेजस खेड्ड परिसर च उद्घाटन करगंन।

<><><><><><>

Japan World Expo

जापान दे ओसाका शैहरे च आयोजित वर्ल्ड एक्सपो-2025 नमैश च जित्थें भारत दी इंजीनियरी दे शानदार नमूने दिक्खने गी लब्बै करदे न उत्थें गै जम्मू कश्मीर दे एतिहासक प्रोजेक्ट बी सब्बने दे आकर्षण दा केन्द्र बना करदे न। चनाह् दरेया पर बने दा दुनिया दा सब्बने थमां उच्चा रेलपुल, अंजी खड्ड आला पुल ते हिमालये दी पहाड़ी श्रृंखला दे शानदार नजारे दे दरमयान तेजिया कन्नै द्रौडदी वंदे भारत एक्सप्रेस रेलगड्डी दा प्रदर्शन सब्बने दा ध्यान अपनी भेठा खिच्चै करदा ऐ। दुनिया भरै दे लोक जम्मू कश्मीर च तैआर कीती गेदी इंजीनियरी दी शानदार मसाल दी सराहना करै करदे न। नमैश च भारत च राष्ट्रीय सतह पर होआरदी तरक्की, तकनीकी विकास ते कुदरत दे अनुकूल विकास आली नीति दी बी बड़र मती सराहना होआ करदी ऐ।

<><><><><><>

Axiom-4

एक्सियोम-4 मिशन पर गेदे भारतीय अंतरिक्ष यात्री गुप कैप्टन शुभांशु शुक्ला ते 3 होर सदस्ये दी वापसी दा सफर शुरू होग। विज्ञान ते प्रौद्योगिकी मंत्री डॉक्टर जितेन्द्र सिंह होरें इक सोशल मीडिया पोस्ट च दस्सेआ जे वापसी यात्रा भारतीय समें मूजब संजा साढ़े चार बजे शुरू होग ते मिशन दे सदस्य कल लगभग 3 बजे धरती पर पुंजडन। पुजने मगरा शुभांशु शुक्ला ते 3 होर सदस्ये गी फ्लाइट सर्जनें दे निरीक्षण च 7 दिन आस्तै रक्खेआ जाग ता जे वापस धरती दे गुरुत्वाकर्षण च समायोजित होई सकन।

<><><><><><>

Doda SBM

डोडा जिले च सार्वजनिक स्वच्छता ते युवा विकास गीजकीनी बनाने दी भेठा इक अहम गैह् पुट्टदे होई जिला विकास कमीशनर हरविंदर सिंह होरें कल सरकारी मैडिकल कालेज डोडा दे ओपीडी ब्लाक कश इक दऊं मंजला संगठित सुविधा दा नीह् पत्थर रखेआ। स्वच्छ भारत मिशन दे दुए गेड़ तैह्त्त शुरू कीती गेदी इस परियोजना दा मकसद स्वच्छता ढांचे दा विस्तार करना ते नोजवानें लेई साजगार म्हौल आली थाहर उपलब्ध कराना ऐ। अधिकारिक जानकारी मूजब इस ब्लाक च अज्जै कल्लै दे ढंगै दिऐं स्वच्छता इकाइएं दे इलावा समुदाय दे इस्तेमाल लेई बहुउपयोगी थाहर बी उपलब्ध होग।

<><><><><><>

Kisht Machail Yatra

किश्तवाड़ दे जिला विकास कमीशनर पंकज कुमार शर्मा ते एसएसपी किश्तवाड़ नरेश सिंह होरें कल मचेल च श्री चंडी माता दरबार दा दौरा कीता ते इस ब'रे दी यात्रा लेई तैआरिएं दा जायजा लैता। उनें यात्रा लेई कीते गेदे ढांचागत निर्माण, साफ सफाई दी बवस्था ते होर दुइएं जरूरी सहूलतें दा जायजा लैता तां जे श्रद्धालुएं गी यात्रा दरान कोई दिक्कत परेशानी पेश नेई आवै। ऐकती एह् यात्रा 25 जुलाई गी शुरू होआ'रदी ऐ। जिला प्रशासन नै यात्रा गी पूरी चाल्ली रमानदारी ते बवस्था आले ढंगै सिर तोड़ चाढऱ्हे लेई लोड़चदे सब्बै इंतजाम कीते दे न।

<><><><><><>